

〈救度佛母二十一種禮讚經〉

布達拉勝境，綠色當字生，當字光度衆，祈並眷屬臨。

諸天非天頂髻嚴，恭敬跪捧兩足蓮，度諸窮苦中之母，致禮救度佛母前。

佛母尊聖救度母，及諸十方三世中，所有諸佛並弟子，我今一心敬讚禮。

花香燈燭及香水，妙食伎樂等供養，實獻即於意所現，皆願衆聖樂納受。

自從無始直至今，十不善及五無間，由心煩惱故所造，一切罪惡皆懺悔。

聲聞緣覺諸菩薩，乃至凡夫諸有情，三世所積諸福善，我皆隨喜盡無餘。

隨諸有情一切願，宜其種種差別智，應其大小通常類，勸轉一切妙法輪。

從今直至輪迴空，請常住世不涅槃，為苦海中諸衆生，悉願聖母慈眼觀。

我今所集諸福善，皆成無上菩提因，惟願不久於衆生，證得無上引導師。

〈度母讚文與利益〉

唵 敬禮尊聖救度母。

敬禮救度速勇母，目如剎那電光照，三世界尊蓮華面，從妙華中現端嚴。

敬禮百秋朗月母，普遍圓照無垢面，如千星宿俱時聚，殊勝威光超於彼。

敬禮紫磨金色母，妙蓮華手勝莊嚴，施精勤行柔善靜，忍辱禪定性無境。

敬禮如來頂髻母，最勝能滿無邊行，得到彼岸盡無餘，勝勢佛子極所愛。

敬禮怛囉吽字母，聲愛方所滿虛空，運足遍履七世界，悉能夠召攝無餘。

敬禮釋梵火天母，風神自在衆俱集，部多起屍尋香等，諸藥叉衆作稱歎。

敬禮特囉胝發母，於他加行極摧壞，展左蹠右作足踏，頂髻熾盛極明耀。

敬禮都哩大緊母，勇猛能摧怨魔類，于蓮華面作顰眉，摧壞一切冤家衆。

敬禮三寶嚴印母，手指當心威嚴相，嚴飾方輪盡無餘，自身熾盛光聚種。

敬禮威德歡悅母，寶光珠蔓衆光飾，最極喜笑睹怛哩，鎮世間魔作攝伏。

敬禮守護衆地母，亦能鉤召諸神衆，搖顰眉面吽聲字，一切衰敗令度脫。
敬禮頂冠月相母，冠中現勝妙嚴光，阿彌陀佛髻中現，常放衆妙寶光明。
敬禮如盡劫火母，安住熾盛頂髻中，普遍喜悅半趺坐，能摧滅壞惡冤輪。
敬禮手按大地母，以足踐蹋作鎮壓，現顰眉面作吽聲，能破七險鎮降伏。
敬禮安穩柔善母，涅槃寂滅最樂境，莎訶命種以相應，善能消滅大災禍。
敬禮普遍極喜母，諸怨支體令脫離，十字咒句妙嚴布，明咒吽聲常朗耀。
敬禮都哩巴帝母，足躡相勢吽字種，彌嚕曼陀結辣薩，於此三處能搖動。
敬禮薩囉天海母，手中執住神獸像，誦二怛囉作發聲，能滅諸毒盡無餘。
敬禮諸天集會母，天緊那羅所依愛，威德歡悅若堅鎧，滅除鬥諍及惡夢。
敬禮日月廣圓母，目睹猶勝普光照，誦二喝囉咄怛哩，善除惡毒瘟熱病。
敬禮具三真實母，善靜威力皆具足，藥叉執魅尾怛辣，都哩最極除災禍。
若有智者勤精進，至心誦此二十一。

〈利益〉

救度尊處誠信禮，是故讚歎根本咒。每晨早起久時禮，憶念施諸勝無畏，
一切罪業盡消除，悉能超越諸惡趣。此等速能得聰慧，七俱胝佛所灌頂，
現世富貴壽延安，當來趣向諸佛位。有時誤服諸毒物，或自然生或合成，
憶念聖尊真實力，諸惡毒藥盡消滅。或見他人遭鬼魅，或發執病受諸苦，
若轉此贊二三七，彼諸苦惱悉蠲除。欲乞男女得男女，求財寶位獲富饒，
善能圓滿隨意願，一切障礙不能侵。